

Cuors dalla veta da nossa cara mumma



Nossa cara sora, mumma, tatta e basatta, madretscha e quinada ei naschida igl 1. d'uost 1924 egl uclaun da Selva, feglia da Gion Antoni Loretz e Maria Constanzia Loretz, naschina Berther. Ella ei naschida sco secund affon da 11 fargliuns. A Selva ha la mumma giu ina biala affonza el ravugl da sia famiglia, la quala ha fatg il pur.

Cunquei che la mumma Maria ei stada ina dallas veglias en famiglia, ha ei era tuccau ad ella da segidar a casa e sil funs. La scola ha ella frequentau a Selva, Sutcrestas, cun ils affons da Tschamut.

Suenter il temps da scola ha ella bandunau il vitget da Selva per serender a Turitg e segidar en in tenercasa. In onn suenter eis ella vegnida a Rueun per emprender il mistregn da cusunza. Adina puspei eis ella returnada a casa per segidar cun ils geniturs.

Cun 26 onns empren Maria d'enconuscher e carezar il giuven Giusep Caduff da Rueras. Ils 19 d'avrel 1951, pia igl onn dallas grondas nevadas e dallas lavinas, meina il Giusep sia spusa Maria agl altar. La mumma raquintava che ses fargliuns ed envidai da Selva hagien giu tuttas breigias da serender a Sedrun per festivar lur nozzas. Ils giuvens conjugals ein lu secasai a Rueras en casa paterna. La lètg ei vegnida benedida cun 7 affons, 4 buobas e 3 buobs. La famiglia ha purtau bia legria, denton era bia laver e quitau. La mumma ha giu bien maun per il tenercasa ed ei adina segidada el menaschi puril e sil funs.

Cunquei ch'il frar Giusep era restaus persuls a Selva, eis el serendius a Rueras tier sia sora Maria ed il quinau Giusep. Igl onn 1993 ha la mort dil consort Giusep tuccau la famiglia Caduff grevamein. La mumma ei restada anavos cun siu frar Giusep ed ensemble han els menau vinavon entgins onns il pign puresser.

Muort vegliadetgna ei Maria e siu frar Giusep sedecidi da secasar en Tgèsa S. Vigeli a Sedrun. Quella midada ei buca stada sempla. Mo la mumma ha gudiu la cumpignia e las biaras visetas. Ils 12 da settember 2011 ha il car frar bandunau quest mund. Per la mumma ei quei danovamein stau ina greva sort.

Il desideri da suandar il consort ei carschius. Ils 12 da schaner 2012 ha Niessegner clamau la cara mumma tier el.

In sincer engraziament a Sur Reto Nay per il bi survetsch divin, sco era a nossa calustra, l'organista ed il chor per igl ornament dalla sepultura. Plinavon in grond Dieus paghi als collaboraturs e collaboraturas dalla Tgèsa S. Vigeli sco era al miedi Dr. Lechmann per la buna tgira che la mumma ha astgau guder ils davos onns.

Las numerusas cartas da condolentscha, donnaziuns, fluras e messas han fatg bein a nies cor e gidau nus da purtar quella crusch. Persuenter, ed a tut tgi che ha fatg dil bien, dau carezia ed amicabladad alla cara defuncta duront sia veta ed accumpaignau ella alla fossa, in grond e sincer Dieus paghi.

Cara mumma e tatta Maria, ruaussa en pasch – nus emblidein tei mai.

Tes affons cun famiglias